



Kuvendi i Komunës Klinë

01Nr. 06-42868 2022

Klinë, dt. 23.12.2022

PROCESVERBAL

Nga mbledhja e rregullt e punës së Kuvendit të Komunës të mbajtur me datë 02. 12. 2022 në ora 10:00 në Sallën e Kuvendit të Komunës.

Pjesëmarrës në mbledhje: Kryetari i Komunës, z. Zenun Elezaj, nënkryetarja, znj. Marqe Selmanaj, drejtorët e drejtorive, përfaqësuesi i policisë nga stacioni policor në Klinë, përfaqësuesi i OSBE, media dhe anëtarët e Kuvendit.

Mbledhja transmetohet drejtpërdrejt audio nga Radio "Alba" dhe audiovizive nga "Klina info". Mbledhja e kuvendit gjithashtu është e incizuar audio nga zyra për punë e Kuvendit si dhe përcjellët nga MPL përmes teleprezencës. Ka zgjatur 1 orë e 50 minuta.

Mbledhjen e hapi kryesuesi i Kuvendit ,z. Fadil Gashi. Ai ju uroj mirëseardhje të gjithë të pranishmëve dhe theksoi se kjo është seancë e nëntorit por për arsye që anëtarët e kuvendit kanë qenë në vizitë zyrtare jashtë Kosovës në javën e fundit të nëntorit, seanca është vendosë të mbahet me datë 2 të muajit dhjetor. Në vazhdim z. Gashi në emër të të gjithë anëtarëve të kuvendit përshëndeti kryetarin e Komunës, nënkryetaren, përfaqësuesin e policisë, OSBE-së, mediat dhe gjithë të pranishmit e tjerë. " Pasi që data dy dhjetor koïncidon edhe me ditëlindjen e presidentit historik dr. Ibrahim Rugova, po e shfrytëzoj rastin që të jua uroj të gjithëve ditëlindjen e tij dhe ju informoi se sheshi në Klinë që me një vendim të Kuvendit është emëruar me emrin "Ibrahim Rugova" është në përfundim të procedurave dhe së shpejti do të nënshkruhet kontrata për ndërtimin e tij" theksoi z. Gashi në vazhdim të fjalës së tij hyrëse.

Kryesuesi gjithashtu në këtë fillim të mbledhjes i shprehu ngushëllime në emër të gjithë kuvendit, në emër të kryetari, nënkryetares dhe gjithë qytetarëve të Klinës, familjes Gjergji nga Klina me rastin e vdekjes së gazetarit të njohur, personalitetit dhe intelektualit të mirënjohur Seremb Gjergji, bashkëshortit të zyrtares për media në Komunën e Klinës, znj. Samije Gjergji.

Për rendin e ditës , kryesuesi i kuvendit hapi debat.

z. Esat Raci: Përshëndetje për të gjithë. Propozoj që në rend dite të futet propozimi i grupit të PDK për zëvendësimin e anëtarit të KPF-së nga radhët e PDK-së. Po ashtu dëshiroj ta kem informacionin për një konkurs në DKRS i cili është anuluar nga

Këshilli për ankesa. Të kemi informacionin e saktë se pse është anuluar ai konkurs? Nëse është në pyetje Komisioni për vlerësim apo diçka tjetër?

Znj. Valmire Krasniqi: Përshëndetje. Edhe grupi ynë kërkon që të bëhet ndërrimi i ish anëtarit tonë që tani më ka kaluar i pavarur nga dy komisioni. Komitetit për arsim dhe planifikim urban si dhe nga Komisioni për emërimin dhe riemërimin e rrugëve. Çështja e dytë jemi shumë të pakënaqur se si është thirrur interpelanca me kryetarin. Nuk është cekur se kush e ka thirrur interpelancën e që është shumë e rëndësishme të dihet.

z. Fadil Gashi, kryesues: Secili anëtar i Kuvendit e ka kërkesën e LVV për interpelancë. Kërkesa vjen deri në zyrën time e pastaj rendin e ditës e bëjë unë. Sidoqoftë kërkesa e juaj është e arkivuar në emrin tuaj si LVV. Shumë kërkesa vijnë tek ne nuk mund të jua cekim kush e ka bërë kërkesën në njoftimin për mbledhje. Gjatë shqyrtimit të këtyre kërkesave do ta shihni se kush i ka bërë kërkesat.

z. Zafer Gashi: Përshëndetje. Kryesues kjo që arsyetuat nuk qëndron. Edhe herën e kaluar e kemi diskutuar këtë çështje. Keni referencat këtu në material që ceket shumë mirë se nga cila drejtori vijnë. Njëjtë është dashtë të bëhet edhe formulimi i pikës së rendit të ditës – interpelancë me kryetarin e Komunës.

z. Fadil Gashi, kryesues: Nuk ke të drejt fare. Nuk shkruan askund se nga cila drejtori referohet. Mos u lidhni me këto imtësira teknike sepse nuk ndryshon asgjë.

z. Valmir Bacaj: Përshëndetje të gjithëve. Unë dua të ndërlidhem tek përfaqësimi në KPF. Është diskutuar në seancën e kaluar dhe po e vazhdojmë edhe në këtë seancë. Propozoj që për shkak të ndryshimeve të fundit në kuvend, të rishikojmë përfaqësimin në këtë komitet. Të bazohemi në udhëzimin administrativ dhe grupi i AAK të përfaqësohet sipas kësaj rregulloreje si grupi më i madh kuvendar me 3 anëtarë në KPF, PDK me 2 anëtarë dhe LDK me dy anëtarë. Ne emrat i kemi dhe këta janë: Tunë Dedaj, Bledar Berisha dhe Blerta Gashi.

z. Arben Limanaj: Përshëndetje të gjithëve. Meqenëse u cek përfaqësimi në KPF në bazë të % në Kuvend, neve si subjekt na takojnë dy përfaqësues. Në këtë rast grupi ynë i LDK llogarisim që kemi vetëm një anëtarë për momentin sepse kryesuesi shkon me automatizëm në këtë komitet. Nëse rishikohet çelësi i deritanishëm atëherë ne kërkojmë edhe një anëtarë në KPF.

z. Esat Raci: Dëshiroj që të ja kujtoj Valmiri se grupi i PDK në mandatin e kaluar ka qenë zemër gjerë dhe nuk i ka marr tre anëtarë qysh i kanë takuar por vetëm dy. Tjetër, kandidatja që ka qenë në LVV ka dalë e pavarur dhe nuk ka aderuar akoma në AAK.

z. Valmir Bacaj: Për dy çështje që përmendi zoti Raci. Udhëzimi që ka hy në fuqi është i vitit 2020 ndërsa mandati për të cilin flet zoti Raci është para se ky udhëzim të hyj në fuqi.

z. Zafer Gashi: Unë po i referohem deklaratës tuaj zoti kryesues kur keni thënë se të gjitha partitë politike në Kuvend duhet të përfaqësohen në KPF, por neve si LVV nuk na dëmton edhe nëse nuk jemi pjesë e KPF-së. Nuk shqetësohemi fare.

z. Fadil Gashi, kryesues: Dua vetëm të sqaroj një gjë në lidhje me udhëzimin që përmendi Valmiri. Ky udhëzim nuk ka ndryshuar asgjë në lidhje me përfaqësimin dhe numrin. Ky udhëzim ka determinuar vetëm kompensimin e komiteteve jo ndonjë ndryshim tjetër. Aleanca sikurse edhe partitë tjera e kanë të drejtën e përfaqësimit në bazë të numrit të anëtarëve në Kuvend. Kur e kemi themeluar këtë komitet kemi thënë se dëmtimi më i madh i bëhet Aleancës, njëjtë sikurse ju ka bërë PDK-së në mandatin e kaluar. Tani ne kemi një vendim të kuvendit. Kemi edhe numrin e caktuar të anëtarëve në KPF që është 7-të anëtarë. Me udhëzim jemi të detyruar që të përfaqësojmë të gjitha etnitetet politike që janë në Kuvend. Po ashtu kemi nenin 12 të këtij udhëzimi që thotë se mandati i anëtarëve në komitetet e përhershme është i lidhur me mandatin e anëtarëve të Kuvendit të Komunës. Anëtarit të komitetit të përhershëm i pushon mandati me rastin e përfundimit të mandatit, me rastin e vdekjes, mos pjesëmarrjen tre herë radhazi në mbledhje dhe neni 5 thotë se Kur anëtari i komitetit të përhershëm kalon në një etnitet tjetër politik ai zëvendësohet nga etniteti politik nga ku ai tërhiqet. Në këtë rast PDK ka të drejtë të propozoj një emër tjetër në vend të anëtarit që ka kaluar në entitet tjetër politik. LVV duhet që të përfaqësohet në komitet sipas udhëzimit ndërsa tek propozimi i LDK-së nuk ka të drejtë sepse unë si kryesues nuk kam ardhur si i pavarur këtu por si anëtar i një entiteti politik.

Në vazhdim u debatua edhe më tutje rreth çelësit të përbërjes së KPF-së ku z. Bacaj insiston tek ndryshimi i këtij çelësi në favor të grupit kuvendar të AAK-së, ndërsa kryesuesi lexoj edhe një herë nenin në udhëzim i cili shpjegon të drejtën e zëvendësimit të anëtarit kur ai kalon nga një grup kuvendar në një grup tjetër.

Z. Tunë Dedaj kërkoj pik për pikë që të zbatohet ligji. Ndërsa kryesuesi tha se nëse rishikohet çelësi duhet të merret vendim për anulimin e vendimit të parë. Ndërsa në vazhdim z. Dedaj propozoj që kjo të shtyhet për në seancën e radhës ndërsa z. Esat Raci insiston që në këtë seancë të bëhet zëvendësimi i anëtarit dhe se grupi i PDK-së do at propozoj anëtarin e ri pavarësisht nëse kalon ose jo. S' kemi nevojë që ta shtyjme për seancën e radhës derisa nuk ka mirëkuptim nga grupi më i madh kuvendar, theksoi z. Raci. Propozimi i z. Bacaj ishte që të vihet në votim propozimi i ri i grupit kuvendar të AAK për ndryshimin e çelësit të përfaqësimit AAK 3 anëtarë, PDK 2 anëtarë, LDK 2 anëtarë. Ndërsa propozimi i zotit Arben Limanaj kërkoj dakordim nga të gjithë që të shtyhet kjo çështje. Kërkoj gjithashtu që PDK të bëjë zëvendësimin e anëtarit të kërkuar dhe se partia më e madhe kuvendare të "lëshoj pe". Kryesuesi në fund kërkoj gjithashtu që të ju epet hapësirë grupeve kuvendare që të bisedojnë dhe të merren vesh e në seancën e ardhshme të votohet dhe morri miratimin e të gjithëve pa ngritje dore.

Rendi i ditës u votua me 25 vota për, asnjë kundër dhe asnjë abstenim.

Pika 1 e Rendit të Ditës: Arsyetimi i mungesave

Në mbledhje të kuvendit mungon Kushtrim Haliti dhe Blerina Gashi të cilët kanë informuar paraprakisht që nuk mund të marrin pjesë në mbledhje.

Pika 2 e Rendit të ditës: Shqyrtimi dhe miratimi i procesverbalit të mbledhjes së kaluar.

Procesverbali i mbledhjes së kaluar u miratua me 25 vota për , asnjë kundër dhe asnjë abstenim. Pa asnjë vërejtje.

Pika 3 e Rendit të ditës: Shqyrtimi dhe miratimi i rekomandimeve të KPF-së.

Në lidhje me rekomandimet e KPF, kryesuesi Gashi theksoi se të gjitha rekomandimet janë në rend të ditës përveç dy kërkesave të cilat janë orientuar në zyrën e kryetarit dhe tjetra në DKA.

z. Zafer Gashi: Kam një kërkesë që është protokolluar me datë 8. 11. 2022 nga një qytetar i Sferkës i cili është i sëmurë me sëmundje malinje dhe ka kërkuar ndihmë. Nuk e shoh fare që është në rekomandimet e KPF, nëse mund të kemi një sqarim do të ishte mirë.

z. Fadil Gashi, kryesues: Ne nuk kemi pranuar një kërkesë të tillë deri tani. Momentin që e pranojmë do ta procedojmë gjithsesi. Kërkesa qenka bërë me datë 8 . 11. 2022 me vonë se sa që është shpërndarë materiali, me siguri vjen në mbledhjen e radhës të KPF. Sidoqoftë do ta verifikojmë. Mund ta ketë marr gabimisht dikush nga drejtoritë por që do të vije te ne gjithsesi dhe do ta procedojmë.

Rekomandimet e KPF-së u votuan në bllok. Me 24 për , asnjë kundër dhe asnjë abstenim U MIRATUAN.

Pika 4 e Rendit të ditës: Shqyrtimi dhe miratimi i propozim vendimit për shpalljen zonë me interes publik të pronave në të dy anët e lumit “Drini i Bardhë”

z. Enver Berisha , drejtor i Urbanizmit: Përshëndetje të nderuar. Ne si drejtori kemi kërkuar që të shpallen këto prona me interes publik me arsyetimin se duhet të intervenohet në lumin “Drini i Bardhë” në rrjedhjen e këtij lumi i cili ka devijuar rrjedha e tij gjatë viteve. Kjo është arsye a kërkesës nga ana e drejtorisë sonë.

Kryesuesi theksoi se jemi konsultuar me zyrën ligjore, dhe se në parim po marrim vendim ku më pastaj është ligji për shpronësim i cili do të i përgjigjet pronarëve.

Me 23 vota për , asnjë kundër dhe asnjë abstenim U MIRATUA

Pika 5 e Rendit të Ditës: Shqyrtimi dhe miratimi i propozim vendimit për shpallje me interes publik të pronave në të dy anët e rrugës në Dresnik.

Drejtori i Urbanizimit, z. Enver Berisha shpjegoi se qëllimi i shpronësimit të anësorëve përgjatë kësaj rruge është se rruga ekzistuese është shumë e ngushtë dhe se është e domosdoshme të zgjerohet.

Kryesuesi, z. Fadil Gashi theksoi se ne si kuvend nuk po definojmë prona në vendimin tonë, aty ku hasin pengesa në të dy anët, ne po jua hapim derën si kuvend e më pastaj janë ligjet për shpronësim.

Me 23 vota për, asnjë kundër dhe asnjë abstenim U MIRATUA.

Pika 6 e Rendit të ditës: Shqyrtimi dhe miratimi i draft programit të banimit 2022-2025.

z. Enver Berisha, drejtor i Urbanizimit: Ne kemi një grup të zgjedhur nga kuvendi dhe kryetari i cili ka përgatitur programin por pasi që kryetari i këtij komisioni, z. Ilir Bacaj nuk është prezent propozoj që të shtyhet për në seancën tjetër.

Kryesuesi tha se këtë material është hera e dytë që e kemi përpara dhe se është shqyrtuar. Në kuvend është sjellë për tu votuar.

z. Zafer Gashi thekoi se është e rëndësishme me qenë prezent dhe me sqaruar këtë program kryetari i komisionit, z. Ilir Bacaj pasi që tek prej faqes 20 fillon analiza sociale dhe shihet që zoti Bacaj me një përkujdesje shumë të madhe ka punuar dhe ka dhënë disa vërejtje anash të cilat nuk janë inkorporuar në këtë draft. Janë disa të dhëna të paketuara për mua pasi që ne të mjekësisë nuk marrim shumë vesh nga matematika. Z. Gashi vuri theksin e veçantë tek faja 19 për përkrahjen e të rinjve për vendbanim, a është fjala për çiftet e reja të martuar apo si. Ka edhe të tjera si në faqen 30 për ndihmën e familjeve me nevojë për banim etj. Ka nevojë për shumë sqarime, theksoi zoti Gashi. Kërkoj sqarime edhe për programin e shkruar në faqen 32, 34, 35 tek ndërtimi i banesës etj. Përfundimisht pajtohem me drejtorin që të jetë zoti Bacaj prezent në mbledhje dhe të na jep sqarimet e nevojshme.

Kryesuesi Gashi theksoi se ky draft është votuar që të lëshohet në debat publik por na ka ardhur shkresa që ky dokument nuk ka nevojë të dal në debat publik. Gjithçka që ka këtu janë parashikime që mendohet të realizohet për këtë periudhë kohore. Nuk është i pa përmirësueshëm në të ardhmen ky program, theksoi kryesuesi para se ta vejë në votim.

Me 19 vota për, dy abstenime dhe asnjë kundër U MIRATUA.

Pika 7 e Rendit të Ditës: Shqyrtimi dhe miratimi i propozim vendimit për ndarjen e parcelës nr. 442-0

z. Qemajl Sejdiu, drejtor i DKA: Përshëndetje të gjithëve. Drejtorja e DKA bazuar në nevojën për ndërtimin e çerdhes së fëmijëve ka kërkuar ndarjen e parcelës në fjalë. Ju kërkoj që ta votoni pasi që është shumë e nevojshme.

Znj. Valmire Krasniqi: Ne jemi për ndërtimin e çerdhes por jo në atë vend. Pse nuk ndërtohet çerdhja në lagjen "Arbëria" ose në parcela ku janë publike, p.sh. mbrapa stacionit të Policisë.

z. Arben Limanaj: vendimi për ndërtimin e kësaj çerdheje është shumë i qëlluar. Ne si grup kuvendar e mbështesim si vendim vetëm se duhet të na sqarohet nëse bëhet fjalë për parcelën që është në oborrin e shkollës "Motrat Qiriazit" ? nëse është fjala për atë parcelë ne , në Kuvend kemi marr vendim që në atë parcelë të ndërtohet një shkollë e re. Ai projekt ish dashtë të realizohet pasi që është dorëzuar në ministri. Nëse behët fjalë për të njëjtën parcele gjithmonë e kam fjalën.

z. Besnik Marku, drejtor i Kadastrit: Përshëndetje të gjithëve. Po bëhet fjalë për të njëjtën parcelë por mbrapa është planifikuar hapësira prej 30 ari që të ndërtohet çerdhja e fëmijëve.

z. Qemajl Sejdiu, drejtor i DKA: Hyrja e çerdhes është nga salla sportive dhe nuk e pengon aspak ndërtimin e ardhshëm të shkollës fillore. Është e njëjta parcelë me numër por ne i kemi bashkangjitur dokumentacionin dhe specifikun se ku do të ndërtohet çerdhja pa e penguar aspak projektin e ndërtimit të shkollës fillore.

z. Zafer Gashi: Është mirë të kemi kujdes sepse gjatë fushatës e kam dëgjuar kryetarin të ketë premtuar se në lagjen "Arbëria" do të ndërtohet një çerdhe e fëmijëve. Pas stacionit të policisë, prona është e komunës dhe është mese e sigurt nga vërshimet ndërtimi i një çerdhe e re e fëmijëve.

z. Zenun Elezaj, kryetar Komune: Përshëndetje për të gjithë. Ka qenë e destinuar për lagjen "Arbëria" ajo çerdhe që në fillim por në pamundësi për të gjetur pronë publike jemi detyruar që ta zhvendosim aty ku po flitet tani. Unë diji që nuk kemi prona aty por do ta verifikojmë. Kemi nevojë edhe për çerdhe tjetër. E kemi humbur një rast që të përfitojmë donacion ndërtimin e një çerdheje në lagjen "Dukagjini" pikërisht sepse s` kemi pasur prona publike në atë pjesë, mos ta humbim edhe këtë rast tani. Do të kemi nevojë vazhdimisht për ndërtimin e çerdheve të reja dhe në të ardhmen pasi ta verifikojmë pronësinë në pjesën ku theksuat ju, do të aplikojmë në fonde e donatorë.

Me 20 vota për , asnjë kundër dhe asnjë abstenim u MIRATUA.

Pika 8 e Rendit të ditës: Interpelanca me kryetarin e komunës për qeverisjen 9-të mujore , thirrur nga LVV.

Në fillim të kësaj interpelance fjalën e morri z. Zafer Gashi nga LVV si thirrës i kësaj interpelance.

z. Zafer Gashi: Qëllimi ynë nuk është që të bëjmë kundërshtime vetëm sepse jemi opozitë por që të ballafaqojmë argumentet në lidhje me zhvillimet dhe realizimin e projekteve të planifikuara, saktësisht mos realizimit të më shumë se sa 75% të projekteve të mos realizuara për vitin 2022. Edhe një herë e falënderoj kryetarin që

është gati për këtë interpelancë dhe e ftoj që të na informoj për të arriturat në realizimin e planifikimeve për këtë periudhë kohore.

z. Zenun Elezaj, kryetar i Komunës: Unë jam fokusuar në përgatitjen e një lloj raportimi për realizimin e programin qeverisës duke u bazuar në dokumentet e miratuara në Kuvend për projektet e planifikuara për implementim. Do të jap një gjendje të datës 31 Tetor, që është gjendje financiare e cila është edhe e aprovuar nga niveli qendror. Me gjithë vështirësitë që na ka sjell ky vit, mund të them që muajve të fundit kemi arritur me një intezitet më të lartë që të përmbushim realizimin e projekteve. Sipas të dhënave të prokurimit i kemi proceduar të gjitha projektet e planifikuara për vitin 2022 dhe pothuajse të gjitha kontratat janë nënshkruar. Disa kontrata kanë qenë dy vjeçare. Ndërsa një projekt që është projekti për ndërtimin e shtëpisë së të moshuarve nuk kemi arritë pasi që kemi mungesë të lokacionit. Ka qenë planifikuar në zonën e dukagjinit duke u bazuar në dokumentet ekzistues kur kemi premtuar por tani më ajo është anuluar nga qeveria. Kemi bërë kërkesë për marrjen e asaj zone dhe jemi në procedurë të privatizimit dhe marrjes së asaj zone. Me hartat zonale shtëpia [për të moshuar është planifikuar tek liqeni akumulues për ujë të pijes por procedurat për shpronësim zgjasin gjithsesi. Në këtë kuptim të gjitha projektet janë realizuar përveç këtij projekti. Deri me 31 tetor 2022 kemi pasur të hyra 1 milion e 755 mijë euro, shpenzimet kanë qenë 8 milion e 125 mijë. Tek kategoria e investimeve kapitale, shpenzimet janë 1 milion e 439 mijë euro. Kemi qenë në një % jo të mirë duke u bazuar me vonesat që na kanë shoqëruar gjatë vitit me rritjet e çmimeve, kontratat e mbetura pa u përmbushur nga OE shkaku i kësaj, në shtator shkëputja e kontratave dhe procedurat e reja etj. Sipas të dhënave të drejtorisë së Urbanizmit, nga gjithsejtë 2 milion 983, e 46 euro, ku 1 milion 47 mijë janë nga grandit 10, grand qeveritar, 582 mijë e 265 euro janë nga të hyrat vetanake dhe 930 mijë e 666 euro janë të hyrat vetanake të bartura nga vitit 2021. Prej tyre pra janë shpenzuar 1 milion e 755 mijë euro ose 58.84% tek investimet kapitale. Me mirë se sa kjo % jemi tek drejtoritë e tjera por ne duhet të arrijmë mbi 75%. Kjo vlerë duhet të arrihet sepse janë kryer shumë projekte por janë në fazën e pranimi teknik. Shpresoj që do ta arrijmë këtë kriter të përfitimit të grandit të performancës. Për fat të mirë Komuna e Klinës është një nga 6-të komunat prej 38 që do të jetë përfituese. Edhe një të dhënë nga financat në total, shpenzimet totale nga të gjitha drejtoritë për investimet kapitale janë 2 milion e 127 mijë e 808 euro. Kjo e dhënë e nxjerrë sot nga drejtoria e financave. Nëse jeni të interesuar për ndonjë projekt specifik jemi të gatshëm të plotësojmë.

z. Zafer Gashi: Faleminderit kryetar. Raporti i GAP ka treguar se Komuna e Klinës është larg përmbushjes së premtimeve. Transparenca le shumë për të dëshiruar. P.sh. zyra e prokurimit- keni lidhë kontratë jashtëligjshëm me personin që ka dalë në pension, e i cili ka pasur probleme edhe me ligj e ka qenë nëpër gjykata. Kur të kam pyetur unë keni thënë se ju ka vazhduar shkaku u përvojës së tij dhe kur ju kanë pyetur në media se a e keni ditur që zyrtari në fjalë ka qenë i akuzuar, ju jeni përgjigjur që se keni ditur. Zyra e personelit- shpallë konkurse, pranohen me nga dy

familjarë etj. etj. Shpallni konkurs dhe e falsifikoni atë, ju e dini punën e drejtorit të QKMF-së së zgjedhur. Jeni i vetmi kryetar i komunës që ju është dashur që të thirrni njësi policore që të intervenojnë në zyrën tuaj për të i hequr qytetarët e Gremnikut shkaku i Fabrikës së Çimentos. Konkretisht sa biznese të grave i ke ndihmuar? Shëndetësia- sigurimi i aparatit mamografik, ku është ai aparat?

z. Gashi kishte vërejtje edhe në drejtorinë e arsimit, punësimet në këtë drejtori, drejtorinë e financave konkretisht tek të hyrat, tek inkasomi i të hyrave. Kishte vërejtje tek dhënia e lejeve për terasave dhe inkasomi i të hyrave nga këto hapësira. Inspektorati i ka dhënë leje punës operatorit i cili ka marr me qira objektin nga një person që atij ja ka dhënë me qira komuna. Më thoni zoti kryetar cilat pajisje i keni blerë për AMF-të. , theksoi zoti Zafer Gashi duke dashur që të vazhdonte edhe më tutje që sipas tij ka shumë të gjetura të tjera, si në Bujqësi e cila ka shpërnda trupa kumbullash e lajthish e nuk din se kujt ja ka ndarë. Z. Gashi foli edhe për mjetet e ndara për dekorim të qytetit 50 mijë euro e që është deklaruar se ato pajisje janë të mbetura nga vitet e kaluara dhe ruhen në sallë të sportit...

Kryesuesi duke theksuar se është tejkaluar shumë koha e planifikuar dhe e rregulluar sipas rregullores për fjalën e thirrësit të interpelancës ja morri fjalën z. Zafer Gashi. Që të kyçen në këtë debat kërkuan edhe z. Esat Raci dhe Valmir Bacaj. Por kryesuesi theksoi se të drejtën e ka për ta përmbyllur kryetari i Komunës sipas rregullores.

z. Zenun Elezaj, kryetar i Komunës: Tani z. Zafer Gashi foli dhe ngriti shumë çështje që e pata të pamundur që ti mbaj shënim nga forma që ai praktikoj për të prezantuar. Krejt ato që fliten nga z. Zafer besoj që janë dëshira të tij. Ekzekutivi vazhdon të punojnë në të mirë të qytetarëve. Ai është mësuar që ta përmend emrin tim, le ta përmend sa të dojë në çfarëdo konteksti, ndërsa ne jemi duke u angazhuar maksimalisht për të implementuar programin qeverisës. Sot puna e jonë është komplet e monitoruar nga niveli qendror. Sa i përket Ujërave të zeza, Zafi duhet ta dijë që nuk ka kapacitete Komuna për të ndërtuar impiant të ujërave të zeza, 10 milion euro, atë mund ta bëjë niveli qendror me të cilin nuk ka munguar përpjekja e jonë për të gjetë bashkëpunim. Njëjtë edhe për ujin e pijes, Komuna e ka kryer obligimin e vet karshi memorandum bashkëpunimit me ministrinë por që ata nuk i janë përmbajtur nënshkrimit të tyre dhe nuk kanë zotuar akoma mjetet prej 600 mijë eurove , të cilat mjete i kanë zotuar në 2021 dhe nuk i kanë zotuar në 2022. Komuna do ta kryej këtë projekt nga të hyrat vetanake në fund të fundit. Unë do të vazhdoj të kërkoj bashkëpunim me çdo instancë të këtij vendi që sa më mirë të ju shërbejmë qytetarëve të Komunës.

Fjalën e kërkoj për përfundim përsëri z. Zafer Gashi por sipas kryesuesit interpelanca përfundon me fjalën përmbyllëse të kryetarit të Komunës.

Pika 9 e Rendit të Ditës: Pyetje dhe Përgjigje

z. Esat Raci: Pyetjen që e bëra në fillim të këtij sesi. Konkursin që e keni shpallur për kulturë dhe ju është kthyer në pikën zero nga këshilli për ankesa i nivelit qendror. Pse ju është kthyer në zero ky konkurs? A është në pyetje komisioni vlerësues që nuk ka qenë në rregull? Nëse po, atëherë çfarë të bëhet me gjitha të punësuarit nga fundi i 2021 e deri tani po nga ky komision. Dhe pyetja e dytë: Kryetar keni premtuar çerdhe dhe shkollë në lagjen "Dukagjini", sot e dëgjuam që në atë lagje nuk ka hapësirë publike për ndërtim. A e ka ditur në kohën e zgjedhjeve kur e ka bërë këtë premtim?

z. Binak Sylaj, drejtor i Administratës: Përshëndetje. Sa për sqarim nuk është anuluar konkursi por është kërkuar nga ne që të plotësojmë komisionin. Është kërkuar nga ne që të formohet një komision ku përfshihen të gjithë shefat e sektorëve por që ndryshon varësisht nga sektori ku mbahet intervista. Për konkursin në fjalë kemi vendimin e këshillit të pavarur ku thotë se komisioni duhet të ketë një zyrtar nga zyra e personelit. Tani e kemi plotësuar komisionin në fjalë dhe na është pranuar nga Ministria e punëve të brendshme dhe sistemi. Intervista është caktuar të mbahet me datë 6 dhjetor. Pra nuk është përsëritë konkursi por është kërkuar që të vazhdohet me plotësim.

z. Zenun Elezaj, kryetar i Komunës: Në programin qeverisës timin asnjëherë nuk e kam përmendur shkollën në lagjen "Dukagjini". Çerdhen dhe shtëpinë e pleqve po por unë e shpjegoja se me vendimi i 2019 ja ka dhënë në shfrytëzim Komunës dhe ka sugjeruar për bartjen e pronësisë të asaj sipërfaqe por këtë vit qeveria e ka anuluar atë vendim dhe na e ka marrë atë pronë . Tani do të shohim procedurat e privatizimit të asaj prone.

z. Esat Raci: Për përgjigjen e parë , ok . Dihet kush punësohet, të gjithë e dimë kush punësohet në Komunë dy apo tre muaj më përpara. I urojmë punësimin aktivitetit të LVV për atë vend të punës. Ndërsa sa i përket pyetjes për kryetarin, unë nuk përmenda programin qeverisës të kryetarit por premtimin e tij elektoral.

Znj. Arta Pantina: Përshëndetje për të gjithë. Dëshiroj të pyes drejtorin e SHP. Në Gllarevë punimet e ujësjellësit janë ndërprerë dhe gropat e hapura janë bërë të rrezikshme për fëmijët që shkojnë në shkollë. Kur do të nis vazhdimi i punimeve të ujësjellësit në fshatin Gllarevë.

z. Qendrim Millaku, drejtor i SHP: Përshëndetje. Po filloj nga pyetja e znj. Blerina Berisha të shtruar në seancën e kaluar ku unë kam munguar për ta lidhur me pyetjen e znj. Pantina tani. Projekti në Gllarevë e diji që është stopuar shkaku i motit dhe vërshimeve në komunën tonë. Projekti është pothuajse në përfundim, ka mbetur vetëm instalimi i pompave në Jarinë dhe Ujmirë dhe trafo në këto dy vende. Besoi se deri në fund të muajit do të përfundojnë këto punime. Për sajimin e gropave presim që të nënshkruajmë kontratë me OE vitin e ardhshëm pasi që ka skaduar kontrata e më hershme.

z. Zenun Elezaj, kryetar: Për gropat e hapura dhe të mbetura ashtu në fshatin Gllarevë, Kompania që është kontraktuar nga CDI e ka për detyrë që ta kthej terrenin ku janë bërë punimet në gjendjen e më parshme. Ne morëm shënim nga zonja Pantina dhe Inspektorati do të dalë në vend që ta konstatoi dhe ndërhyjë gjithsesi.

Znj. Besiana Gashi: Përshëndetje të gjithëve. Kam një pyetje për drejtorin e Shëndetësisë. Kemi informata që mjekët punojnë në orët e kujdestarisë dhe nuk paguhet, Po ashtu kemi informata që mjete ka për pagesë, ku po shkojnë këto mjete?

z. Agron Bacaj, drejtor i shëndetësisë: Orët shtesë ose orët kujdestarie paguhet atëherë kur tejkalojnë orët shtesë. Kjo është e rregulluar me ligj. Sa për informim për këto orë shtesë që e tejkalojnë numrin e orëve që e parasheh ligji paguhet rreth 2000 euro në muaj. Një detaj tjetër, ju e dini kontrata kolektive për punëtorët e shëndetësisë është anuluar nga një zëvendësministër dhe kjo nga data 1 dhjetor na paraqet probleme të tjera sepse neve na duhet që tani të bëjmë kalkulimet në bazë të ligjit të punës. Disa beneficione hiqen që ishin të parapara me kontratë kolektive pasi që tani do të na duhet të përmbahemi vetëm në ligjin e punës.

z. Arben Limanaj: Unë kam një pyetje për drejtorin e DKA. Furnizimi i shkollave me lëndë djegëse mungon edhe pse është muaji dhjetor.

z. Qemajl Sejdiu, drejtor i DKA: Besoi se ky problem ka qenë gjithandej Kosovës pasi që ka pasur probleme shkaku i çmimeve të rritura nga inflacioni. Tek ne furnizimi me pelet ka përfunduar ndërsa kemi pasur pak problem me furnizim me dru. Kjo është në procedurë të tenderimit dhe shumë shpejt do të përfundoj. Njëherë për njëherë nuk kemi mungesa në asnjë shkollë.

z. Azdren Ramadani: Ka më shumë se dy javë që ndriçimi publik në sheshin "Faruk Elezi" Nuk funksionon. Banorët dhe bizneset në këtë shesh ankohen për mungesë të ndriçimit.

z. Qendrim Millaku, drejtor i SHP: Nuk besoj që janë dy javë që mungon ndriçimi. Kam kaluar andej, ndoshta një apo dy ditë ka munguar.

z. Zenun Elezaj, kryetar: Sigurisht që do ta shohin nëse sot është funksionalizuar ndriçimi. Do të shikohet nga menaxheri i kontratës dhe do të ndërhyhet.

Znj. Marigona Racaj: Përshëndetje. Kam një pyetje për drejtorin e arsimit. A është e vërtetë që mesimdhënësit e shkollës fillore "Motrat Qiriaz" kanë shkuar në shëtitje në Shqipëri duke humbur një ditë pune. A është marr pëlqimi nga drejtorja e arsimit për këtë shëtitje?

z. Qemajl Sejdiu, drejtor i DKA: Po është e vërtetë që shkolla ka vepruar ashtu. Dita e shkollës ka qenë të dielën dhe ata kanë vazhduar duke bërë një pauzë dhe bërë një shëtitje. Për mos lajmërim ju është shqiptuar vërejtje drejtorit të shkollës.

Znj. Valmira Krasniqi: Kam një pyetje për kryetarin dhe për drejtorin e SHP. Me 7 dhjetor 2020 përmes një postimi në FB i ka informuar qytetarët se Komuna e Klinës së bashku me qeverinë Zvicerane ka filluar ndërtimin e ujësjellësit për 20 fshatra ku është edhe fshati Perqevë. Banorët e këtij fshati thonë se nuk është investuar asgjë për ujë të pijshëm. Shpimet që janë bërë në këtë fshat, një banor pyet nëse shpimet janë bërë për të hulumtuar ujë të pijshëm apo nëse mund të ketë material për prodhimin e çimentos?

z. Zenun Elezaj, kryetar: Projektin e CDi e kemi shpjeguar disa herë. Fati i Perqevës është fati i njëjtë me projektin që sipas zotimeve të CDi do të përfundoj këtë vit. Uji do të shkoj në Perqevë. E dyta, po më vjen keq që po bini pre e këtyre thash e thënave. Unë do të ju përgjigjem korrekt. Aty shpimet janë bërë për të hulumtuar nëse ka ujë sepse për ujë ka pasur nevojë fshati. Në gjuhen e shkencës thuhet se Hulumtimet kur bëhen edhe nëse nuk zbulohet ajo që dëshirojmë prap është sukses sepse e dimë të kundërtën.

z. Zafer Gashi: Pyetja ime është për kryetarin. Rezultatet po shihen. Po ju them sinqerisht se ajo që është bërë në zgjedhjet e fundit ka qenë fatkeqësi. A mund të na jepni një përgjigje konkrete- a keni qenë pro apo kundër fabrikës së çimentos në vitin 2017. Pyetja tjetër pranimi i kuadrit në shkollën e mesme profesionale "Fehmi Agani" a është kryer sipas ligjit? A janë pranuar tre persona apo dy?

z. Zenun Elezaj, kryetar: veprimet e mija unë i kam marrë sipas kohës dhe kjo është çështje ndërlidhet me punën profesionale. Në vitin 1988 si student i magjistrature në Zagreb kam bërë analizën e parë të mergeles dhe kam sjellë rezultat se ajo lëndë e parë mund të përdoret për prodhimin e çimentos. Proceset e tjera janë transparente dhe unë punoj dhe veproj sipas pozitës që kamë. Pra, në librat e mija që janë libra të respektuara mund të i gjesh këto analiza, që donë me i lexuar ti jap.

z. Qemajl Sejdiu, drejtor i DKA: Çdo konkurs hapet në bazë të ligjeve dhe udhëzimeve administrative dhe i nënshtrohet procedurave ligjore. Për procedurat e konkursit në fjalë në shkollën e mesme profesionale "Fahmi Agani" në Klinë, pas publikimit të rezultateve definitive, kandidatët e pakënaqur kanë pasur të drejtë ankese në afat prej 8 ditëve. Komisioni i ankesave pas shqyrtimit të lëndëve ankuese ka ardhur në përfundim se njëri nga tre kandidatet e përzgjedhur nuk i plotëson kushtet dhe kriteret dhe i njëjti komision e ka anuluar pozitën e tretë në atë konkurs. Pozita e njëjtë është shpallur prap në konkurs të rregullt dhe është në proces të zhvillimit.


z. Zafer Gashi: Njëri nga kandidatët që është pranuar e ka një konfirmim nga fakulteti i mjekësisë që është i diplomuar. A mjafton ai konfirmim apo duhet me pas diplomën gjithsesi?

z. Qendrim Millaku, drejtor i SHP: Dua vetëm që të sqaroj z. Zafer Gashi se projekti prej 50 mijë euro për ndriçim dekorues është projekt tre vjeçar.

Pas përfundimit të sqarimit të fundit nga drejtori i SHP , kryesuesi konstaton se nuk ka të tjerë anëtarë të kuvendit që dëshirojnë të bëjnë pyetje. Kjo pikë e Rendit të Ditës ishte pika e fundit prandaj kryesuesi duke falënderuar të gjithë për kontributin e dhënë e shpallë të mbyllur këtë mbledhje të kuvendit.

Procesmbajtës:

Skënder Behramaj



Kryesues:

Fadil Gashi

